

STRELJAČKI SAVEZ BOSNE I HERCEGOVINE

PRAVILNIK
O DISCIPLINSKOJ I MATERIJALNOJ ODGOVORNOSTI

21.11.2016.

Na osnovu člana 27. Statuta Streljačkog saveza Bosne i Hercegovine, Upravni odbor Streljačkog saveza Bosne i Hercegovine dana 21.11.2016. donosi

P R A V I L N I K

o disciplinskoj i materijalnoj odgovornosti

OPĆE ODREDBE

Član 1.

Pravilnik o disciplinskoj i materijalnoj odgovornosti Streljačkog saveza Bosne i Hercegovine (u daljem tekstu: Pravilnik) utvrđuje disciplinske prestupe, propisuje disciplinske mjere i postupak, te utvrđuje disciplinsku odgovornost za disciplinske prestupe svih sudionika streljačkog sporta.

Član 2.

Disciplinski prestup je svako kršenje odredbi Statuta i drugih općih akata Streljačkog saveza Bosne i Hercegovine, ISSF-a i Olimpijskog komiteta Bosne i Hercegovine.

Član 3.

Izricanje disciplinskih mjera ima za cilj sprečavanje prestupa, te odgojno djelovanje na počinitelja i ostale sudionike streljačkog sporta.

OSNOVNE ODREDBE

Član 4.

Sudionici streljačkog sporta su: takmičari, suci, delegati, treneri, klubovi i savezi, te njihova tijela i rukovodstvo (u daljem tekstu: sudionik).

Član 5.

Nepoznavanje statuta i drugih općih akata Streljačkog saveza Bosne i Hercegovine i njegovih tijela ne oslobađa sudionike za učinjene disciplinske prestupe.

Član 6.

Krivnja sudionika postoji u slučaju:

- a) kada je disciplinski prestup učinjen namjerno ili iz krajnje nepažnje,
- b) propuštanje izvršenja radnje koje je dužan izvršiti,
- c) podsticanje, pomaganje ili pokušaja vršenja disciplinskog prestupa.

Za podsticanje, pomaganje ili pokušaj može se izreći blaža disciplinski mjera od propisane ovim pravilnikom.

Član 7.

Ako je izvršeno više disciplinskih prestupa, prethodno se utvrđuje visina disciplinskih mjera za svaki pojedinačni slučaj, a potom izriče jedinstvena disciplinska mjera koja ne može preći dvostruku visinu najteže utvrđene disciplinske mjere.

Član 8.

Ako se za vrijeme izdržavanja disciplinske mjere izvrši novi disciplinski prestup, najprije se izriče disciplinska mjera za novonastali disciplinski prestup, a potom jedinstvena disciplinska mjera u smislu člana 7. ovog pravilnika.

Član 9.

Kod izricanja disciplinske mjere uzimaju se u obzir sve okolnosti koje utiču na smanjenje ili povećanje disciplinske mjere (olakšavajuće i otežavajuće okolnosti), a naročito težina izvršenog disciplinskog prestupa i njegove posljedice, stepen odgovornosti izvršitelja, pobude iz kojih je disciplinski prestup izvršen, okolnosti pod kojima je izvršen, ranije ponašanje izvršitelja i njegovo držanje nakon učinjenog disciplinskog prestupa.

Ukoliko se za disciplinski prestup tokom disciplinskog postupka utvrdi više olakšavajućih okolnosti, može se izreći i blaža disciplinska mjera od predviđene određenim članom ovog pravilnika.

Član 10.

Težim disciplinskim prestupom smatra se disciplinski prestup koji je učinjen na međunarodnim te zvaničnim državnim takmičenjima ili prestup za koji se može izreći zabrana nastupa ili obavljanja funkcije duže od šest mjeseci.

Član 11.

Ako disciplinski prestup prvi put učini sudionik mlađi od 18 godina, može se izreći blaža disciplinska mjera od predviđene ovim pravilnikom.

Član 12.

Disciplinska mjera ne može se donijeti bez saslušanja osobe protiv koje se vodi disciplinski postupak.

Osoba protiv koje se vodi disciplinski postupak smatra se saslušanom ako na poziv nadležnog disciplinskog tijela dostavi pisanu izjavu.

Član 13.

Disciplinska mjera zabrane nastupa na određenom broju prvenstvenih ili kupskih kola ne može biti veća od tri nastupa.

Disciplinska mjera iz prethodnog stava može se izreći takmičaru umjesto disciplinske mjere zabrane nastupa na određeno vrijeme u trajanju do tri mjeseca, s tim da zabrana nastupa na jednom takmičenju odgovara zabrani nastupa u trajanju jednog mjeseca.

Član 14.

Novčane disciplinske mjere utvrđuje Upravni odbor Streljačkog saveza Bosne i Hercegovine i one čine sastavni dio ovog pravilnika.

DISCIPLINSKE MJERE

Član 15.

Disciplinska mjera može se odrediti nakon počinjenog disciplinskog prestupa i utvrđene krivnje počinitelja, a u skladu sa ovim pravilnikom.

Član 16.

- A) ZA TAKMIČARE:
- a) opomena,
 - b) ukor,
 - c) zabrana nastupa na određeno vrijeme,
 - d) zabrana nastupa na određenom broju prvenstvenih i kupskih takmičenja,
 - e) zabrana nastupa u reprezentaciji,
 - f) isključenje iz Streljačkog saveza Bosne i Hercegovine,
 - g) doživotna diskvalifikacija.
- B) ZA TRENERE, SUCE, RUKOVODIOCE, SAVEZE:
- a) opomena,
 - b) ukor,
 - c) zabrana obavljanja funkcije na određeno vrijeme,
 - d) isključenje iz organa Streljačkog saveza Bosne i Hercegovine,
 - e) doživotna diskvalifikacija.
- C) ZA KLUBOVE:
- a) opomena,
 - b) ukor,
 - c) novčana disciplinska mjera,
 - d) oduzimanje bodova.

Član 17.

Disciplinska mjera zabrane nastupa je ujedno i zabrana obavljanja funkcije i obrnuto, a traje u skladu sa odlukom kojom je izrečena disciplinska mjera.

Član 18.

Disciplinska mjera zabrane nastupa za određeno vrijeme kao i zabrana nastupa na određenom broju prvenstvenih ili kupskih kola odnosi se podjednako na ekipna i pojedinačna takmičenja.

Član 19.

Disciplinska mjera oduzimanja bodova može se izreći samo na domaćim takmičenjima, a može se oduzeti najviše deset bodova.

Ukoliko klub do izricanja disciplinske mjere iz prethodnog stava nije osvojio dovoljan broj bodova, ti će se bodovi oduzeti od onih bodova koje osvoji do kraja takmičarske sezone.

Član 20.

Za disciplinske presteupe koje učini rukovoditelj kluba, odgovornost može snositi i klub ukoliko daje podršku učinjenom prestupu.

Za disciplinski prestup iz prethodnog stava klubu se može izreći disciplinska mjera zabrane nastupa od jednog do tri prvenstvenih ili kupskih kola.

Član 21.

Disciplinska mjera izrečena streljačkom klubu, ne odnosi se na nastupe u reprezentaciji, ukoliko disciplinski prestup nije takve prirode da narušava ugled i interes streljačkog sporta, o čemu odluku donosi Upravni odbor Streljačkog saveza Bosne i Hercegovine.

DISCIPLINSKE PRESTUPNE MJERE

Član 22.

Disciplinskim prestupom smatra se svaki prestup za koji se može izreći disciplinska mjera utvrđena ovim pravilnikom.

Član 23.

Nesportsko ponašanje

Pod nesportskim ponašanjem podrazumijeva se: prigovori rukovodiocima ili sucima, neizvršavanje njihovih odluka, vrijeđanje, psovanje, činjenje nepristojnih pokreta ili ometanje drugih takmičara prije, za vrijeme ili neposredno nakon takmičenja.

Za disciplinski prestup iz prethodnog stava može se izreći opomena ili ukor, a u ponovljenom slučaju zabrana nastupa ili zabrana obavljanja funkcije od jednog do tri mjeseca.

Član 24.

Nepravilno nastupanje

Nepravilnim nastupanjem smatra se kada takmičar nastupi na takmičenju za klub za koji nije registrovan ili nije stekao pravo nastupa ili kada takmičar nastupi ako se nalazi pod suspenzijom ili pod izdržavanjem disciplinske mjere izrečene ovim pravilnikom.

Za disciplinski prestup učinjen u smislu prethodnog stava može se izreći disciplinska mjera zabrane nastupa od dva do šest mjeseci, a odgovornom rukovodiocu ekipe može se izreći disciplinska mjera zabrane obavljanja funkcije od tri do osam mjeseci.

Član 25.

Ometanje ili prekid takmičenja

Ako bilo koji sudionik svojim ometanjem spriječi održavanje takmičenja ili nastupa, te zbog toga dođe do prekida takmičenja ili nastupa, može se izreći disciplinska mjera zabrane nastupa ili zabrana obavljanja funkcije do šest mjeseci.

Disciplinska mjera iz prethodnog stava može se izreći i klubu.

Član 26.

Nedolazak na takmičenje

Za neopravdani nedolazak delegiranog suca ili tehničkog delegata na takmičenje, može se izreći disciplinska mjera zabrane obavljanja funkcije od jednog do tri mjeseca, dok u ponovljenom slučaju može se izreći disciplinska mjera zabrane obavljanja funkcije do šest mjeseci.

Član 27.

Fizički napad

Ukoliko sudionik učini tjelesni napad na bilo kojeg drugog sudionika na takmičenju, prije takmičenja, neposredno poslije takmičenja, može se izreći disciplinska mjera zabrane nastupa od tri mjeseca do dvije godine.

U slučaju uzvraćanja tjelesnog napada koji se ne može svrstati pod pojam samoodbrane, odnosno ako se učini naknadni tjelesni napad može se izreći disciplinska mjera zabrane nastupa ili obavljanja funkcije od dva mjeseca do dvije godine.

Ako kod tjelesnog napada dođe do teških tjelesnih povreda, kao i u ponovljenom slučaju može se izreći disciplinska mjera doživotne diskvalifikacije.

Član 28.

Konzumiranje alkohola ili opojnih droga

Konzumiranje alkohola ili opojnih droga na takmičenjima, kojim sudionik sebe dovodi u stanje kojim narušava ugled streljačkog sporta, smatra se disciplinskim prestupom i može se izreći disciplinska mjera zabrane nastupa ili obavljanja funkcije od jedne do dvije godine.

Član 29.

Vrijeđanje i kleveta

Ukoliko bilo koji sudionik streljačkog sporta vrijeđa, kleveće ili širi neistinite glasine o drugom sudioniku, klubu, rukovodiocu, odnosno Streljačkom savezu ili njegovim tijelima, smatra se disciplinskim prestupom i može se izreći disciplinska mjera zabrane nastupa ili obavljanja funkcije do šest mjeseci, a u ponovljenom slučaju može se izreći disciplinska mjera zabrane nastupa ili obavljanja funkcije do godinu dana, a klubu se može izreći novčana mjera.

Član 30.

Nepoštivanje obaveza

Nepoštivanje obaveza smatra se disciplinskim prestupom za slučajeve: kasno podnošenje izvještaja sa takmičenja, neplaćanje troškova sudaca ili delegata kao i drugih troškova predviđenih u općim aktima streljačkih tijela, nepodnošenje članskih iskaznica i drugih isprava, registracija takmičara, neplaćanje članarine i drugih pristojbi za klub ili takmičare, neprijavljivanje takmičenja, kao i sve radnje koje otežavaju rad streljačkih tijela ili drugih sudionika.

Za disciplinski prestup iz prethodnog stava može se izreći disciplinska mjera zabrane nastupa odnosno obavljanja funkcije od jednog do šest mjeseci, a klubu se može izreći novčana kazna.

Član 31.

Davanje netačnih podataka

Davanje netačnih podataka smatra se disciplinskim prestupom za slučajeve: netačnih podataka u izvještajima sa takmičenja, u prijavama odnosno drugim dokumentima u vezi s registracijom takmičara, sudaca ili rukovodioca, a za što se može izreći disciplinska mjera zabrane nastupa odnosno zabrane obavljanja funkcije od jednog do šest mjeseci, a klubu novčana mjera.

Član 32.

Nepoštivanje pravilnika

Svaki sudionik koji netačno, namjerno ili neuredno provodi odredbe Statuta ili općih akata Streljačkog saveza Bosne i Hercegovine ili njegovih tijela, a koji narušava ugled streljačkog sporta, smatra se da je učinio disciplinski prestup za koji se može izreći disciplinska mjera zabrane nastupa, odnosno zabrane obavljanja funkcije od dva mjeseca do godinu dana.

Član 33.

Prestup na međunarodnim takmičenjima

Disciplinski prestupi učinjeni na međunarodnim takmičenjima smatraju se teškim disciplinskim prestupima i za takve prestupe može se izreći disciplinska mjera zabrane nastupa ili obavljanja funkcije od šest mjeseci do dvije godine.

Član 34.

Ostali slučajevi

Sve radnje ili ponašanja koje ovim pravilnikom nisu izričito uređene kao disciplinski prestupi, a predstavljaju povredu Statuta i drugih općih akata Streljačkog saveza Bosne i Hercegovine, odnosno prelaze granicu uobičajene i dopuštene sportske i druge djelatnosti smatraju se disciplinskim prestupom, i može se izreći jedna od disciplinskih mjera određena ovim pravilnikom predviđena za sličan slučaj.

SUSPENZIJA

Član 35.

Suspenzija je oblik izricanja disciplinske mjere koja može biti automatska ili odlukom nadležnog disciplinskog tijela.

Član 36.

Automatska suspenzija je disciplinska mjera koja nastaje isključenjem a koja se može izreći na takmičenju ili nastupu u skladu sa tehničkim pravilnicima. Ova disciplinska mjera traje 30 dana, a može i duže ukoliko se prijavom pokrene disciplinski postupak.

Odlukom nadležnog disciplinskog tijela, disciplinska mjera može se izreći u slučaju težeg disciplinskog prestupa na osnovu prijave kojom udaljenje traje duže od jednog mjeseca, a najduže dva mjeseca.

Disciplinska mjera iz prethodnog stava može trajati i duže od dva mjeseca, ako disciplinsko tijelo utvrdi da mora provesti ispitni disciplinski postupak, odnosno prikupiti činjenice, ali ne duže od tri mjeseca, ako ovim pravilnikom nije drugačije određeno.

Član 37.

Disciplinsko tijelo može donijeti odluku o skidanju udaljavanja utvrđenom u prethodnom članu, ako u disciplinskom postupku utvrdi da nema opravdanih razloga za provođenje daljeg disciplinskog postupka u odnosu na prirodu izvršenog prestupa.

Član 38.

Disciplinsko tijelo može izreći disciplinsku mjeru udaljavanja za slučajeve:

- a. kada je izvršen teži disciplinski prestup i traje do donošenja odluke,
- b. neodazivanje na poziv u disciplinskom postupku i traje do odazivanja,
- c. kada se sudionik iz člana 4. ovog pravilnika nalazi u pritvoru, a traje do ukidanja pritvora.

Član 39.

Protiv odluke o udaljavanju nije dopuštena žalba.

Udaljavanje se računa u disciplinsku mjeru.

Član 40.

Ako klubovi ne izvršavaju novčane ili druge obaveze prema Streljačkom savezu, može se klubu izreći zabrana nastupa do izvršenja obaveze.

DISCIPLINSKA TIJELA

Član 41.

Disciplinske postupke provode disciplinska tijela Streljačkog saveza Bosne i Hercegovine na osnovu:

- a. prijave o disciplinskom prestupu,
- b. po službenoj dužnosti, kada se ne poštuju opći akti i rokovi propisani ovim pravilnikom, a sve radi zaštite interesa streljačkog sporta.

Prilikom pokretanja disciplinskog postupka po službenoj dužnosti, disciplinska tijela uzimaju u obzir i eventualne predstavke ili upozorenja sudionika ili nadležnih tijela koji zastupaju interese streljačkog sporta.

Član 42.

Disciplinski postupak je dvostepeni.

Disciplinski sud je prvostepeni organ.

Upravni odbor Streljačkog saveza Bosne i Hercegovine je drugostepeni organ.

Član 43.

Disciplinski sud iz prethodnog člana ima predsjednika i dva člana.

Disciplinski sud bira i imenuje Skupština Streljačkog saveza Bosne i Hercegovine.

Član 44.

Nadležnost disciplinskog suda je da vodi postupak po prijavi za disciplinske prekršaje koji su se desili kako na međunarodnim tako i na domaćim takmičenjima i prekršaje koje su se desili van takmičenja.

Član 45.

Upravni odbor provodi disciplinski postupak u drugom stepenu a na osnovu žalbe izjavljene na odluku disciplinskog suda u prvom stepenu.

Član 46.

Član disciplinskog suda koji je lično zainteresovan za predmet o kojem se provodi disciplinski postupak može učestvovati u raspravi, ali bez prava odlučivanja, što će disciplinski sud urediti svojim poslovníkom.

Član 47.

Odluka o disciplinskim mjerama sadrži:

- a. ime i prezime, odnosno naziv izvršitelja disciplinskog prestupa,
- b. opis i vrstu disciplinskog prestupa,
- c. vrstu disciplinske mjere,
- d. obrazloženje i pouka o pravu na žalbu.

DISCIPLINSKI POSTUPAK

Član 48.

Disciplinski postupak pokreće se prijavom ili po službenoj dužnosti. Prijava može biti pisana ili usmena, uzeta na zapisnik.

Prijavu o pokretanju disciplinskog postupka podnose svi sudionici streljačkog sporta utvrđeni u članu 4. ovog pravilnika.

Prijava za pokretanje disciplinskog postupka podnosi se nadležnom disciplinskom sudu.

Prijava za pokretanje disciplinskog postupak podnosi se u roku od godinu dana od dana učinjenja prestupa.

Član 49.

Prijava za pokretanje disciplinskog postupka mora sadržavati:

- a. naziv tijela kojem se prijava dostavlja,
- b. ime i prezime, odnosno naziv sudionika protiv kojeg se prijava podnosi,
- c. gdje i kada se dogodio disciplinski prestup,
- d. osnovne činjenice koje su bitne za pokretanje disciplinskog postupka, a u vezi s disciplinskim prestupom,
- e. ime i prezime, odnosno naziv podnositelja prijave s potpisom tj. pečatom.

Član 50.

Disciplinsko tijelo može po službenoj dužnosti pokrenuti disciplinski postupak u roku do godinu dana od dana učinjenja prestupa.

Član 51.

Po prijemu prijave, disciplinski sud utvrđuje da li je prijava podnesena u roku i od ovlaštene osobe, te da li ima nedostataka.

Prijavu o disciplinskom prestupu podnijetu nakon proteka propisanog roka ili podnijetu od neovlaštene osobe disciplinski sud će odbaciti, a za nepotpunu prijavu zatražit će dopunu u propisanom roku.

Ukoliko disciplinski sud utvrdi da nije nadležan za provođenje disciplinskog postupka po podnijetoj prijavi, istu će proslijediti nadležnom tijelu, odmah.

Član 52.

Disciplinski sud je dužan u ostavljenom roku pribaviti pisanu ili usmenu izjavu, odnosno omogućiti prisustvo u disciplinskom postupku osobe protiv koje se vodi disciplinski postupak.

Na disciplinski postupak mogu biti pozvane i druge osobe koje mogu doprinijeti objektivnosti odluke o disciplinskoj mjeri.

Ukoliko se osoba protiv koje se vodi disciplinski postupak neopravdano ne odazove na poziv, odnosno ukoliko ne dostavi pisanu ili usmenu izjavu, smatrat će se da ne želi učestvovati u disciplinskom postupku, a isti će se provesti prema raspoloživoj dokumentaciji.

Član 53.

Ako disciplinski sud utvrdi da ne postoje razlozi ili da postaje okolnosti koje isključuju odgovornost, odnosno nema dokaza o učinjenom disciplinskom prestupu ili se utvrdi da se počinjenim disciplinskim prestupom ne može teretiti osoba protiv koje je pokrenut disciplinski postupak, donosi odluku kojom se disciplinski postupak obustavlja.

Član 54.

Disciplinski sud može odlučiti da se disciplinski postupak zaključi bez rasprave ukoliko postoje relevantne činjenice za donošenje ovakve odluke.

Ukoliko disciplinski postupak treba provesti, donosi se zaključak kojim se provodi dopuna disciplinskog postupka.

Član 55.

Disciplinski sud može odlučiti da se zaključeni disciplinski postupak ponovo otvori ako se naknadno isti dopuni ili razriješe neka bitna pitanja koja utiču na otvaranje istog.

Otvaranje disciplinskog postupka ne može se izvršiti istekom šest mjeseci računajući od dana pravomoćnosti odluke kojom je disciplinski postupak zaključen.

Član 56.

Disciplinski sud može zbog svrsishodnosti odlučiti da se disciplinski postupak za pojedine osobe protiv kojih je isti pokrenut razdvoji i posebno dovrši, što će ovisiti o činjenicama utvrđenim tokom disciplinskog postupka.

Član 57.

Ukoliko disciplinski sud ne provede disciplinski postupak u propisanom roku, sudionik u disciplinskom postupku ima pravo žalbe kao da je donijeta odluka o disciplinskoj mjeri. Žalbu dostavlja disciplinskom drugostepenom tijelu.

Član 58.

Odluka o disciplinskoj odgovornosti dostavlja se u roku od osam dana po njenom donošenju neposredno uz potpis, elektronskom poštom ili poštom preporučeno izvršitelju disciplinskog prestupa i njegovom matičnom klubu, te podnosiocu prijave.

Ako se odluka o disciplinskoj odgovornosti ne može predati neposredno, putem elektronske pošte ili preporučenom poštom, ista se ističe na oglasnoj ploči kluba čiji je član izvršitelj ove odluke, te na oglasnoj ploči Streljačkog saveza Bosne i Hercegovine. Odluka o disciplinskoj odgovornosti postaje pravomoćna istekom osam dana po isticanju na oglasnoj ploči.

Član 59.

Odluka kojom je izrečena disciplinska mjera zabrane nastupa na određenom broju takmičenja ili na određeno vrijeme počinje teći od prvog takmičenja na svim službenim takmičenjima Bosne i Hercegovine koje organizuje Streljački savez Bosne i Hercegovine, a tu spadaju: Premijer liga Bosne i Hercegovine, Kup Bosne i Hercegovine, turniri u organizaciji Streljačkog saveza Bosne i Hercegovine.

U slučaju da neposredno pri donošenju odluke iz prethodnog stava počinje prvi nastup, u tom slučaju odluku saopćiti usmeno (neposredno ili telefonom), e-mailom. Ovu odluku saopćiti izvršitelju disciplinskog prestupa i klubu čiji je izvršitelj ove odluke član – takmičar.

Ukoliko se disciplinska mjera utvrđena u stavu 1. ovog člana ne može izvršiti u tekućoj takmičarskoj sezoni, ostatak neizvršene disciplinske mjere nastavlja se u sljedećoj sezoni, osim za disciplinsku mjeru zabrane nastupa na određeno vrijeme koje traje.

Član 60.

Pravomoćna odluka o disciplinskoj mjeri upisuje se u registar disciplinskih mjera koje vodi disciplinski sud, te u evidenciju članova tj. takmičara, a na osnovu dostavljene pravomoćne odluke.

Član 61.

ŽALBA

Na odluku o disciplinskoj mjeri može se izjaviti pisana žalba ili usmena na zapisnik u roku od osam dana po prijemu odluke.

Žalba se predaje disciplinskom sudu koji je dužan nakon provedenog ispitnog postupka istu proslijediti drugostepenom disciplinskom organu u roku od osam dana, računajući od dana prijema žalbe.

Žalba ne zadržava izvršenje odluke o disciplinskoj mjeri.

Član 62.

Žalbu mogu podnijeti:

- a. izvršitelj odluke o disciplinskoj mjeri,
- b. podnositelj prijave o pokretanju disciplinskog postupka,
- c. klub čiji je član izvršitelj odluke o disciplinskoj mjeri.

Disciplinski sud, po prijemu žalbe, dužan je utvrditi da li je žalba dopuštena, dostavljena pravovaljano.

Ukoliko disciplinski sud utvrdi da žalba ispunjava sve uvjete iz stava 2. ovog člana, žalbu s cjelokupnim materijalom po kojem je donijeta odluka dostavlja drugostepenom disciplinskom organu na dalje postupanje u roku od osam dana po prijemu žalbe.

Žalbu koja je dostavljena nepravovremeno ili od neovlaštene osobe disciplinski sud će odbaciti zaključkom i isti dostaviti prigovaraču i drugostepenom disciplinskom tijelu.

Za žalbu koju je potrebno dopuniti, disciplinski sud zatražit će dopunu u roku od tri dana po prijemu iste. Žalbu prispjelu nakon proteka roka koji odredi disciplinski sud ili uloženu od neovalštene osobe nakon tražene dopune, disciplinski sud će odbaciti.

DRUGOSTEPENI DISCIPLINSKI ORGAN

Član 63.

Drugostepeno disciplinsko tijelo provodi disciplinski postupak povodom žalbe uložene na odluke prvostepenog disciplinskog suda.

Drugostepeno disciplinsko tijelo iz prethodnog stava, rješavajući po žalbi uloženoj na disciplinske mjere, može odlučiti:

- a. da se odluka o disciplinskoj mjeri ukine i predmet vrati disciplinskom sudu na ponovni postupak,
- b. da odluku o disciplinskoj mjeri potvrdi svojom odlukom,

- c. da odluku o disciplinskoj mjeri preinači, disciplinsku mjeru smanji ili poveća ili oslobodi disciplinske odgovornosti.

Izrečena disciplinska mjera ne može se povećati ako žalbu uloži samo osoba protiv koje se vodi postupak.

Drugostepeno disciplinsko tijelo odluku po žalbi mora donijeti u roku od 30 dana, računajući od prijema žalbenog materijala. Ovaj rok se može produžiti samo u slučaju ispitnog postupka, o čemu donosi zaključak o produženju postupka po žalbi ali ne duže od 60 dana.

Odluka donijeta u drugostepenom postupku je konačna u redovnom postupku.

BRISANJE DISCIPLINSKIH MJERA

Član 64.

Brisanje disciplinskih mjera vrši se protekom propisanih rokova uređenih ovim pravilnikom, uz uvjet da izvršitelj disciplinske mjere ne učini novi disciplinski prestup.

Odluku o brisanju disciplinskih mjera donosi disciplinski sud novom odlukom na način da se upišu riječi: „Brisano iz evidencije“.

Član 65.

Disciplinske mjere brišu se:

- a. istekom šest mjeseci po izvršenju disciplinske mjere ukora ili opomene,
- b. istekom dvije godine nakon izvršenih disciplinskih mjera zabrane nastupa ili obavljanja funkcije do godinu dana,
- c. istekom pet godina nakon izvršene disciplinske mjere zabrane nastupa i obavljanja funkcije duže od godinu dana.

Podaci o disciplinskim mjerama koje su brisane iz evidencije ne mogu se koristiti u novim disciplinskim postupcima.

ZASTARA POKRETANJA DISCIPLINSKOG POSTUPKA

Član 66.

Zastara pokretanja disciplinskog postupka znači da protekom propisanog roka ne može se podnijeti prijava za pokretanje disciplinskog postupka.

Član 67.

Prijava za pokretanje disciplinskog postupka zastarijeva u roku od godine dana od dana učinjenja prestupa.

Član 68.

Kod odluke kojom se utvrđuje materijalna disciplinska mjera nema zastare.

OBNOVA POSTUPKA

Član 69.

Disciplinski postupak može se obnoviti nakon pravomoćnosti odluke o disciplinskoj mjeri samo u slučajevima pribavljenih novih činjenica koje mogu bitno uticati na pravomoćnu odluku.

Disciplinski postupak može se obnoviti:

- a. ako se utvrdi da je odluka pravomoćna i da je zasnovana na lažnim dokazima,
- b. ako se utvrde nove činjenice putem pisanih dokaza ili putem svjedoka koje nisu bile dostupne pri donošenju prvobitne odluke,
- c. ako su činjenice i dokazi činjenično i uzročno vezani za vrijeme, mjesto i počinitelja.

Član 70.

Obnovu postupka mogu pokretati svi sudionici utvrđeni u članu 4. ovog pravilnika na način i rokovima propisanim ovim pravilnikom.

Obnovu disciplinskog postupka može pokrenuti i disciplinski sud po službenoj dužnosti ukoliko utvrdi ili ima dostupne podatke utvrđene u prethodnom članu i rokovima propisanim ovim pravilnikom.

Prijedlog za obnovu postupka ne odlaže izvršenje disciplinskih mjera.

Član 71.

Obnova postupka pokreće se kod disciplinskog suda koji je donio odluku o disciplinskim mjerama u prvom stepenu.

Ako disciplinski sud utvrdi da je obnova postupka osnovana, provest će novi postupak i donijeti novu odluku kojom će odrediti disciplinsku mjeru u skladu s utvrđenim novim činjenicama i ovim pravilnikom.

Protiv odluke o disciplinskoj mjeri u obnovljenom postupku može se izreći žalba u roku od osam dana po prijemu iste.

Na prigovor o obnovi postupka prilažu se nove činjenice, odnosno dokazi.

VANREDNO UBLAŽAVANJE DISCIPLINSKIH MJERA

Član 72.

Vanredno ublažavanje disciplinskih mjera izriče disciplinski sud na osnovu zahtjeva koji podnosi izvršitelj disciplinske mjere, streljački savez ili klub.

Postupak za vanrednim ublažavanjem disciplinskih mjera pokrenut će disciplinski sud za slučaj kada utvrdi da je disciplinska mjera za vrijeme dijela izdržavanje disciplinske mjere, imala puno odgojno djelovanje, a izvršitelj je disciplinsku mjeru izdržao najmanje polovinu određenog vremena.

Disciplinski sud, pri vođenju postupka o vanrednom ublažavanju disciplinske mjere, mora proučiti cjelokupni predmet i svojim prijedlogom isti dostaviti drugostepenom disciplinskom tijelu, koje će utvrditi da li je zahtjev osnovan te će donijeti odluku o ublažavanju ili oslobađanju izvršitelja daljeg izdržavanja disciplinske mjere.

Zahtjev za vanredno ublažavanje disciplinske mjere može se podnijeti samo jedanput.

Protiv odluke kojom se ublažava disciplinska mjera ili zahtjev odbija nema žalbe.

Član 73.

Zahtjev za vanredno ublažavanje disciplinske mjere kojom je izrečena doživotna diskvalifikacija može se podnijeti kada prođu najmanje četiri godine, računajući od dana pravomoćnosti odluke.

Zahtjev za ublažavanje disciplinske mjere iz prethodnog stava može podnijeti samo Skupština Streljačkog saveza Bosne i Hercegovine.

Ukoliko se zahtjev o ublažavanju disciplinske mjere doživotne diskvalifikacije negativno riješi, isti se može ponoviti protekom dvije godine, računajući od dana odluke o negativnom rješenju prvog zahtjeva.

PRELAZNE I ZAVRŠNE ODREDBE

Član 74.

Na učinioce prekršaja primjenjuje se Pravilnik koji važi u vrijeme kada je prekršaj učinjen.

Član 75.

Tumačenje ovog pravilnika je u nadležnosti Upravnog odbora.

Član 76.

Ovaj disciplinski pravilnik stupa na snagu danom njegovog usvajanja od strane Upravnog odbora Streljačkog saveza Bosne i Hercegovine.

Entitetski savezi dužni su uskladiti svoje pravilnike u roku od 60 dana od dana stupanja na snagu ovog pravilnika.

Predsjednik UO

Nijaz Šahinović

